

Uummannap Upernaviullu eqqaanni assartuutit motorinik ingerlatillit atorneqarneri pillugit Namminersornerullutik Oqartussat nalunaarutaat nr. 16, 13. juli 2000-imeersoq Atuussimasoq (Historisk)

Avatangiisit innarlitsaaliorneqarnissaannik inatsisartut peqqussutaanni nr. 12, 22. december 1988-imeersumi, inatsisartut peqqussutaatigut nr. 7, 13. maj 1993-imeersukkut aamma inatsisartut peqqussutaatigut nr. 14, 31. oktober 1996-imeersukkut allangortinneqartumi, § 7 b, imm. 1 aamma § 46, imm. 2 naapertorlugit aalajangersarneqarpoq:

Kapitali 1

Atuuffissai il.il

§ 1. Uummannap Upernaviullu kommuniini nunaannarmi pinngortitap avatangiisillu illersorneqarnissaat eqqarsaatigalugu assartuutit motorillit sumi atorneqarsinnaaneri pillugit malittarisassat nalunaarummi uani aalajangersarneqarput.

Imm. 2. Nunaannaat nalunaarummi uani tassaatinneqarput sumiiffiit kommunit illoqarfinnut nunaqarfinnullu pilersaaruteqarfigisaasa avataanniittut kiisalu akuerisaasunik nunaannarnut pilersaaruteqarfigineqanngitsut. (nunaannaat pillugit pilersaarut)

Imm. 3. Kangerluit imartallu sikuutillugit nunaannarmiittutut naatsorsuunneqassapput.

Imm. 4. Sumiiffik pineqartoq tassaavoq avannamut Upernaviup Kommuniata avannamut kil-linganiit kujammut Uummannap Kommuniata kujammut killerpiaa - tak. nunap assinga ilanngussaq 1.

Imm. 5. Nunat assingi ilanngussat 1 - 3 sumiiffiit assartuutit motorillit atorneqarsinnaaffiik takutitsisuupput.

§ 2. Assartuutit nalunaarummi uani tassaatinneqarput:

1) qamutit motorillit suulluuniit, sikumi, apummi, qaqqani kiisalu nunap ilusaani allani allangortinneqanngitsuni atugassatut sanaat taakkunaniluuniit atorneqartartut, kiisalu

2) angallatit motorillit suulluuniit kuunni tatsinilu imeqarfiit eqqaanni naalakkersuisut matusaasa iluini angalanermut atorneqartut.

Imm. 2. Angallavigineqarsinnaatitaasut nalunaarummi uani tassaatinneqarput aqqudit nunap assingini ilanngussani 1-3-imi takutinneqartut 100 meterisut silitsigisut assartuutinik motorilinnik angallavigineqarsinnaasut.

Imm. 3. Sumiiffiit motorilinnit angallavigineqarsinnaasut nalunaarummi uani tassaatinneqarput sumiiffiit assartuutinik motorilinnik angallavigineqarsinnaasutut akuerisat.

Kapitali 2

Angallannermut ataatsimut aalajangersakkat

§ 3. Nalunaarummi uani angallavigineqarsinnaatitaasutut taaneqartut kiisalu sumiiffiit, motorilinnik angallavissatut immikkoortitaasut avataanni motorilinnik angalaneq inerteqqutaavoq.

Imm. 2. Aqqusinerni, unittarfinni assigisaannilu tamanut naatsorsuussani angallanneq inatsisini allani malittarisassaqaartinneqarpoq, taamaammallu nalunaarummi uani pineqarani.

Imm. 3. Naalackersuisut kommunillu avatangiisinik pinngortitamillu nakkutilliillutik angalaneri, annaassiniarnerit, politiit misissuineri assigisaallu nalunaarummi uani pineqanngillat.

§ 4. Imeqarfiit eqqaanni sumiiffinni matusani angallassissutinik motorilinnik atuineq tamarmi inerteqqutaavoq.

§ 5. Tamanna pisariaqartutut isigineqarpat kommunalbestyrelsit angallavigineqarsinnaatitaasunik kiisalu sumiiffinnik motorilinnit angallavigineqarsinnaasunik nalunaaqutsersuisitsisinaapput.

Sumiiffinni angallavissiarineqartuni angalanermut maleruaqqusat

§ 6. Nunami angalasoqarsinnaavoq

1) nuna imermik unerarfigineqanngippat kiisalu ima qajannaatsigippat nuna naasullu ajoquserneqartussaananik, imaluunniit

2) nuna qerisimappat naasullu apummit 20 cm-iteriusumit, aputip naqigutap 7 cm-iusup nunap qaaniit uuttukkap taamaaqataanik, qallersimappata.

Imm. 2. Nuna angallavigineqarunnaassaaq aput illersuutaasoq peeruppat kiisalu issangiarnertigut aattornerup nalaani nunalluuniit aqilinerata nalaani.

Imm. 3. Angalanermi nuna naasunut aseruutaasinnaasumik sangupiloorfigineqassanngilaq. Kiisalu orpikkat masarsuttallu aqqusaarneqassanngillat.

Imm. 4. Kuuit sinaat uingarnillu kiisalu tatsit killingi, kuuit annerit kiisalu kangerluit ajornanngippat ikaarneqartassapput naasut nunallu ajoquserneqarfissarinngisaasigut.

Imm. 5. § 6, imm. 1-imi aalajangersakkat immap sikuani angallannermut atuutinngillat.

Kapitali 3

Immikkut akuersissuteqartarnerit

§ 7. Inuussutissarsiorlutik angalasut § 3, imm. 1-imi aalajangersakkanit

atuutsitsivigineqannginnissaannik Avatangiisinut Pinngortitamullu Naalackersuisoq immikkut akuersissuteqarsinnaavoq.

Imm. 2. Imm. 1 naapertorlugu immikkut akuersissutit sivisunerpaamik ukiumut ataatsimut atuuttussanngortinneqartassapput.

Imm. 3. Kattuffiit peqatigiiffiillu inuussutissarsiorlut sinnerlugit imm. 1 naapertorlugu immikkut akuersissuteqartoqarnissaanik qinnuteqarsinnaapput.

§ 8. Angallavigineqarsinnaasut sumiiffiillu nalunaarummi uani taaneqartut avataanni angalanissamut Avatangiisinut Pinngortitamullu Naalackersuisoq immikkut akuersissuteqarsinnaavoq soorlu ilisimatuutut sulianut, sulianut inuussutissarsiornermut tunngassuteqartunut, timersornikkut aaqquissuussinernut, nerisassanik angallassinernut imaluuniit allanik inuiaqatigiit eqqarsaatigalugit

pisariaqartunik patsiseqartunut.

§ 9. §§ 7 aamma 8 malillugit immikkut akuersissuteqarfigineqarnissamik qinnuteqaat allakkatigoortuussaaq, kiisalu makku pillugit paasissutissanik imaqaassalluni:

- 1) Inuit immikkut akuersissummi ilaatinneqartut tamarmik aqqi
- 2) Immikkut akuereqqunermut pissutaasut
- 3) Nunap assingini pineqarsinnaasuni annerpaani angallavigineqartussatut pilersaarfiit titartakkat kiisalu angallavigineqartussat qanoq akulikitsigisumik angallavigineqartarnissaat
- 4) Assartuutit amerlassusaat suussusaallu
- 5) Piffissaq immikkut akuersissuteqarfigineqartussaq kiisalu
- 6) Paasissutissat allat Avatangiisinut Pingortitamullu Naalakkersuisup suliamik suliarinninneranut pingaaruteqarsinnaasut.

Imm. 2. Angalanissaq qaammammik ataatsimik sioqqullugu qinnuteqaat nassiunneqassaaq

Imm. 3. Avatangiisinut Pinngortitamut Naalakkersuisup immikkut akuersissuteqarnermi naleqqussorineqartunik piumasaqaateqarsinnaavoq.

Imm. 4. §-it 7 aamma 8 naapertorlugit immikkut akuersissutigineqartut Avatangiisinut Pingortitamullu Naalakkersuisumit qaqugukkulluunniit allanngortinneqarsinnaallutilluunniit atorunnaarsinneqarsinnaapput immikkut akuersissuteqarnermi piumasaqaatigineqartut unioqqutinneqarpata imaluuniit Avatangiisinut Pinngortitamullu Naalakkersuisup isumaa naapertorlugu pinngortitaq avatangiisillu ajoquserneqartillugit.

§ 10. Kapitali manna naapertorlugu aalajangiinerit tamarmik kommunit pineqartut tusarniaavigineqareernerisigut pisassapput.

Kapitali 4

Nakkutilliineq il.il.

§ 11. Kommunalbestyrelsit nalunaarummi uani malittarisassat malinneqarnersut nakkutigissavaat.

Imm. 2. Kommunalbestyrelsit angallavissani sumiiffinnilu nalunaarummi uani taaneqartuni angalanernik inerteqquteqarsinnaapput peqqussuteqarsinnaallutillu § 6, imm. 1 aamma 2-imi angalanermut maleruaqqusat piffissap ilaani naammassineqanngikkaanngata.

Imm. 3. Peqqussutit tassaasinnaapput angallaviit aalajangersimasut atorneqarnissaannik piumasaqaatit.

Imm. 4. Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaanik piumasaqaatit.

Imm. 5. Nakkutilliinermut atortitsinermullu Avatangiisit innarlitsaaliorneqarnissaat pillugu inatsisartut peqqussutaanni nr. 12, 22 december 1988-imeersumi, inatsisartut peqqussutaasigut nr. 7, 13. maj 1993-imeersukkut allanngortinneqartumi, kapitali 4-imi § 44, imm. 2-imi malittarisassat aamma atuupput.

§ 12. Nalunaarut manna naapertorlugu aalajangikkat tamarmik Avatangiisit innarlitsaaliorneqarnissaat pillugu inatsisartut peqqussutaanni kapitali 10-mi malittarisassat naapertorlugit naammagittaalliutigineqarsinnaapput.

Kapitali 5

Pineqaatissiisarnermut atuutilernissaanullu aalajangersakkat

§ 13. Uku akiliisussanngortinneqarsinnaapput:

- 1) § 3, imm. 1-imik, § 4, imm. 1 aamma 2-imik kiisalu § 6, imm. 1-4-imik unioqutitsisut
- 2) § 11, imm. 2 naapertorlugu peqqussutinik inerteqqutinillu uniuusut
- 3) § 9, imm. 3 naapertorlugu piumasaqaatigineqartunik malinninngitsut.

§ 14. Aktiaateqarluni piginneqataassuteqarlunilluunniit ingerlatseqatigiiffik, piginneqatigiilluni ingerlatseqatigiiffik (piginneqatigiiffik) assigisaaluunniit unioqutitsisuuppat ingerlatseqatigiiffik inatsisini taama isigineqarnini naapertorlugu akiliisussanngortinneqarsinnaavoq. Namminersornerullutik Oqartussat, kommunit imaluunniit kommunit suleqatigiiffiat unioqutitsisuuppata Namminersornerullutik Oqartussat, kommunit kommunilluunniit suleqatigiiffii taamaannermissut akiliisussanngortinneqarsinnaapput.

§ 15. Nalunaarut manna ulloq 1. september 2000 atuutilerpoq.

Namminersornerullutik Oqartussat, ulloq 13. juli 2000.

Alfred Jakobsen

/

Hans J. Høyer

Nunat Assinga 1

Nunat Assinga 2

Nunat Assinga 3